

illatam coerceri potuisse. Decreti verba sunt: [Dum pro causis publicis, priuatorumque querelis Parisius moraremur, vir Apostolicus frater noster Domnus Pappolus Episcopus mediocritati nostrae detulit in querelam, in Castro Dunensi, par oecchia denique Carnotina, quod Castrum nec ad territorium ciuitatis vestrae, nec ad vestram Prouinciam manifestum est pertinere, à vobis contra omnem rationem & contra Canonicam disciplinam Episcopum consecratum. Et licet secundum prisca beatissimorum Patrum Decreta, potuit huiusmodi excessus in vestra iniuria acerbius coerceri: sed nos caritatis iura seruantes beatitudini vestrae indicamus, vt Presbyterum ipsum nomine Promotum, qui omissa seueritate Canonica à vobis dicitur tam temere consecratus, vt iuste debeat de gradus ipsius dignitate deponi, sicut Canonum constituta sanxerunt, ad vos euocetis, vel vobiscum retineatis: vt iniuriam nec Ecclesiae, nec Sacerdoti suo vltius debeat inrogare. Et quia à fratre vestro Domno Germano Episcopo, ad petitionem Domni Constituti Metropolitanus, vt ad Synodum venire deberet, est praesentanea inuitatione commonitus, quod quoque Domnum Constitutum & Domnum Germanum constat in Synodum retulisse, & ad Synodum venire distulit.] Haec sunt verba Concilij Parisiensis ad Aegidium Rhemensem. At quis talia primos hosce Galliarum Episcopos ad proprium Primatem, quem vt totius dioeceseos caput summo cum honore venerati fuissent, scripsisse, etiam suspicari potest? Certè hunc tanta dignitate ornatum vix creditur, lectorisque eruditi iudicium sit.

Rothomagus, quam in secunda Lugdunensi ponit Ammianus* Marcellinus, eiusdem Prouinciae Metropolis est, vt in Notitia legitur. Ab alijs ciuitas Rothomagensium seu Rothomagorum, Rodonium & Rodomus dicitur, estque antiquissima sedes Episcopalis. Etenim Auitianus huius Episcopus subscripsit Concilio primo Arelateni, & post eum Eusebius interfuit Agrippinensi, vt ex eorum actis clarum est. Quod autem etiam Metropolis Ecclesiastica fuerit, patet ex Concilio Aurelianiensi primo, cui sic subscripsit Rothomagensis Pontifex: [Gildaredus Episcopus Ecclesiae Rothomagensis Metropolis subscripsi.] Circa annum 742. huius Praelati pallium Archiepiscopale à Romano Pontifice acceperunt, ab eoque tempore Primates dicti sunt, quod à Primatis Lugdunensis iurisdictione exempti essent. Siquidem duo Primatum antiquitus fuerunt genera, alijque sic dicti, quod pluribus Metropolitanis praessent, & alij quod à Primatum iurisdictione eximerentur.

Ciuitas Turonorum, & Caesarodunum, ad Ligerim sita est, non minus opibus aedificiorumque praestantia celebris, quam regionis amoenitate, aërisque placida temperie grata. Diuisione facta Lugdunensium, Metropolis tertiae dignitatem obtinuit, vt in Notitia prouinciarum ciuitatumque Galliae perspicitur. Gratianus, alijs Gatianus, huius primus Episcopus dicitur apud Gregorium* Turonensem. Sed longè celebrior Diuus Martinus, cuius vitam scripsit Seuerus Sulpitius. Turonorum autem Episcopum Metropolitanum fuisse, satis ex hoc probatur, quod Perpetuus illius Episcopus primo Concilio Turonico praefuerit, & Licinius sic Aurelianiensi primo subscripserit: [Licinius Episcopus Ecclesiae Turonicae Metropolis subscripsi.] Si de huius prouincia queras, dicam multos Notitiam ciuilem, quam in huius libri exordio po-

XIII.
METROPOLIS, ET
PROVINCIA RO-
THOMAGENSIS.
a Ammian. Marc.
lib. 35.

XIII.
METROPOLIS, ET
PROVINCIA
TURONENSIS.

b Greg. Turo. hist.
Franc. lib. 1. cap. 28.